

Delegat Mehmed Bradarić postavio je dva pitanja.

Prvo pitanje upućeno je svim institucijama Bosne i Hercegovine koje glasi:

„1. Koliko su institucije BiH u periodu od 2006. do 2011. godine isplatile na ime troškova školovanja svojim rukovodiocima i zaposlenicima? Pregled napraviti po godinama i korisnicima. Navesti na kojoj su poziciji, odnosno koje poslove obavljaju oni koji su dobili sredstva za školovanje (prvenstveno me zanimaju dobivena sredstva za polaganje i odbranu magistarskih i doktorata).

2. Za rukovodioce institucija, bez obzira da li su to bili ili jesu ministri ili direktori institucija, navesti koje su teme magistarskih odnosno doktorata, koliko odbranjena tema ima dodirnih tačaka s poslovima i zadacima koje su obavljali ili obavljaju u svojim institucijama.

3. Navesti da li su lica koja su dobila sredstva još u institucijama BiH ili su ih napustili dobrovoljno ili po prestanku mandata i da li su u ugovorima koje su morali zaključiti prilikom dobivanja sredstava imali zaključenu klauzulu o roku u kojem trebaju ostati u institucijama BiH.“

Drugo pitanje upućeno je Vijeću ministara BiH, a glasi:

„Zašto je došlo do kašnjenja u realizaciji Projekta digitalizacije audiodifuzije u Bosni i Hercegovini? Podsjećam na činjenicu da je Bosna i Hercegovina potpisivanjem multilateralnog sporazuma u Ženevi 2006. godine preuzela obavezu da najkasnije do 2015. godine u potpunosti ugasi analogni signal emitiranja u Bosni i Hercegovini. Na 18. sjednici, održanoj 22.6.2012., kada se raspravljalo o Izvještaju o radu Ureda za razmatranje žalbi za 2011. godinu, upozorio sam da Ured u cijelosti ne primjenjuje svoj poslovnik, što je dovelo do dugotrajnog sukoba unutar URŽ-a i stvorilo probleme u vođenju žalbenog postupka u vezi s javnom nabavkom opreme za prvu fazu digitalizacije javnih RTV servisa u BiH. Dakle, neobjašnjivo ponašanje odgovornih lica u URŽ-u je razlog što ni nakon pet mjeseci od zakonom predviđenog roka nije donesena konačna odluka po žalbi. Dakle, tražim da Vijeće ministara BiH što hitnije naloži URŽ-u da u okviru ovlaštenja utvrđenih Zakonom o javnim nabavkama BiH i na način uređen Pravilnikom o radu Ureda okonča postupak po žalbama u

spomenutom predmetu. U protivnom, građani BiH neće moći od 2015. godine koristiti svoje prijemnike.“